

BUSINÀ 79°

2003-2004

(Bellinaso Fabio – Raiteri Pier Luigi)

Buna sira, buna sira me cari siuri. E ben, c'mè c'la va?

U smeja ieri c'as suma vist e u j'è zà pasà in ani! Che brüt ani; a l'è c'men-sipià con doi ciuc ch'i m'hòn purtà veja quater fanciòt 'd l'Asuciasion, che l'ani pasà i j'eru chi ansèma a noi a recitè la Divòta Cumedia. Me um pias pensè che, quondi ch'i vigherrei cantè j'òngel, ui na sarà quater che voi i vighi nénta, ma ch'i saròn sémper ant u noster cor: ciao Maura, ciao Nicoletta, ciao Andrea, ciao Pier Paolo! Grassie per tüt cul ch'i j'ei facc per l'Asuciasion!

Gram Pier Paolo, a l'era 'csì tifus di Grigi e uarda te che fen ch'i j'hòn facc! L'ani pasà u j'era cul platon del president c'u diva c'l'era tüt a pòst e ist'ani a suma andacc a fè u ritir ant'j'Ort, mòngè a la Micarèla e giughè u derby al Castlas: e a l'uma ònche pèrs!

Adès voi i pensi: Gilindu el c'mensa a parlè 'd Lisòndria e chisà se c'u dis? Gnente du tüt! Uarda te 'sti pulitic, pitòst che fès criticchè, i j'hòn facc gnente du tüt. I j'ei vist di parchegi nóv? Me no. I disu ch'i stòn stüdiònda el 'piano parcheggi'...: pü piòn che 'csé, i poru nénta andè!

I j'ei vist di giarden nóvi per fè giughè el masnà? Me no, ònche se ad gent c'l'a giòga a n'hó vista tònta... Eh, 'sti genij dla viabilità ch'i j'hòn sémper voia 'd giughè: in ani coi serc a fè el rutondi, in atr'ani coi pné e i culur per giughè an sla stata! 'd la Spinèta! I j'avu fina bütà i palèt culurà per fè la gimkana. Pó', na bèla vòta, u j'è sparì tüt!

Però, a pensèi ben, in afari ampurtònt i l'hòn facc, na ròba straordinaria: i j'hòn turna drubì el pont 'd la Sitadéla,... ammach s'el pióv nénta, ma a l'è zà cuc cosa! Ma, tònt che la gent a l'era là c'l'a uardava, lur se ch'i j'hòn facc? I j'hòn sarà Via Dante!

Però a j'hó senti dì ch'i stòn travajònda per fè dventè l'Università 'd Lisòndria la pü frequentaia del Piemont. Me a digh che s'i la spusteisu dausén a l'Esselunga, dato che andrenta a l'Esselunga u j'è sémper tònta gent, j'avreisu risolt el problema.

A proposit 'd l'Esselunga: Lisòndria l'è dventaja la sità di Supermercati: i spontu c'mé i fons. Acsé a son andacc a senti i me culega cumerciònt per savei se ch'i pensu ad tüt 'sta 'Galassia' ad supermercati c'u j'è, e a j'hó dicc: "Pensèi' Bennet' prüma 'd rispondi". Ai l'hó ciamà 'Unes per Unes', perchè a suma na grande 'Famila' e a so nenta s'ui seja cuc cosa 'DiMeglio' per tirè anòn 'DìperDì', ma, dal risposti 'lper' anvilinaij c'a j'hó

sentì, la conclusion a l'è che 'Alessandria 2000' l'ha ancora d'ambsoègn di cit cumerciònt c'mé noi!

I j'ei vist an Posta, is son facc anfluensè da la nostra Aministrasion! Ma sé, i j'hòn bütà ònche lur i palèt. A j'èv zà pruvà a entrè per paghè cuc cosa o per piè la pension? 'T c'mensi a girèi antur a 'sti palèt e pó' se 't sbagli e 't vai an cunfision, guai! A j'hó vist jèn c'l'è entrà per spedì na racumandaja; a l'ha c'mensà a girè tònt, che quòndi c'u stava per sòrti a l'era zà rivaja la ricevuta di ritorno.

A l'è che a ven vègg e a capis pù se c'ui capita ant ist mond: ònche el ròbi pù facili, i son dventaij difìcili. Pruvè a piè l'autostrada; l'è facil entrè, ma poi 't ei pù bon a sòrti! 'T rivi lè e 't vighi scricc: 'FastPay – TelePass – ViaCard'. A l'è nént pusibul scrivi cuc cosa an italiòn? Se 't sai nént l'ingleis, at devi andè an gir cun l'interprete!

TelePass i m'hòn spiegà c'l'è na machinèta che te ut smeja 'd nent paghè, ma tònt che 't pasi, i t'hòn zà lapà i sòld an bònca.

FastPay i m'hòn spiegà c'l'è in afari per paghè sgagià, ònche se poi at tj a bütì in'ura; sé, perchè 't trovi pù l'umen c'ut fa paghè el bièt, no! Adès i j'hòn bütà na dòna, c'l'a dev esi ben cìta, perchè a la sta andrenta na casèta c'mé cula dl'elemosina an cesa: e a la dev esi ònche an pò' gnurònta, perchè la dis sèmpèr el medesim ròbi: "Introdurre il biglietto, introdurre la scheda o il contante, ritirare il biglietto". E a l'è ònche a pò' maledücaja, perchè 't póri ciamèi du tüt e le at dis ammach "Arrivederci e grazie"... quòndi 't ei bon andè veja.

Se d'no, 't tróvi scricc ViaCard, ch'el vo di che 't paghi cun na tesereina c'mé cula che 't drobi quòndi 't vai au supermercato! Sé, perchè 't vai an gir ammach cun del tèseri an sacocia: cula du telefonen, cula per fè bensina, na tèsera per ogni supermercato! Lé 't vai, 't crompi e it dòn di poncc: pù poncc 't fai sü, pù 't póri guadagnè di premi! Pó' at 't n'antaji che 't hai spendì in patrimoni e lur it dòn in babaciu che se 't al crumpavi, 't spendivi menu!

Fina Bossi a l'ava pensà 'd fè la Padania Card: pù poncc 't avi, pù extracomunitari 't spedivi a cà. Per furteina a l'è mai partija!

Con 'sta quistion di poncc, i j'hòn facc ammach n'afari au l'incuntrari: la patente! Lé, anveci ad dètia; it ja gavu! In me amis, c'l'ava capì gnénte du tüt, el prüm dì c'l'era entraja in vigur 'sta legg, a l'è partì e a l'ha pià doi semafori rus parlònda au telefonen, senza sintura e quòndi ch'i l'hòn fermà, a l'ha tirà fora la tessera du supermercà, pensònda 'd ritirè el premi. Anveci ui j'hòn ritirà la patente e a s'è sagrinà da mat!

El bèl, ch'i l'avu spiegaja ben 'sta quistion di poncc a la television. A l'è che, del vòti, ta 't andrumenti dadnòn a la television. L'atra sira am son sugnà che Bush, Putin e Berlusconi i moru e i rivu dadnòn au Signur. Bush

ui va dausen e ui ciama: "Signur, c'mè c'l'a sarà l'America senza me?". E u Signur ui pènsa in mument e pó' us büta a piònsi c'mé na masnà. Poi ui riva Putin e ui ciama: "Signur, c'mé c'l'a sarà la Russia senza me?". E u Signur ui pènsa in mument e pó' us büta turna a piònsi c'mé na masnà. Per ültim ui riva Berlusconi e ui ciama: "Papà, c'mé c'l'a sarà l'Italia senza me?". U Signur ui pènsa in mument, poi u taca a reji c'mé in mat!

A l'è che me a la uard pòc la television, perchè a j'hó da cüntè el bëci tònt c'a dròm. Ònche perchè se 't la uardi, 't póri vigghi ammach del gròn buricadi. Ist ani i j'hòn tirà fora du trasmision d'asident; jëina i j'hòn dicc c'l'era nova, 'I Raccomandati': che nova?! A Montecitorio a l'è quarònt'ani ch'i la fòn! O l'atra, c'a l'è cula ch'i j'avu stüdià la manera 'd fè dimagri la gent ampurtònta: 'L'isola dei Famosi'. A l'è che quindi ch'i j'hòn facc pàrti la 'lettera F', i pensavu 'd fè pàrti Ferrara e anveci i séi chi ch'i j'hòn mandà veja? Fassino! E uardè c'mé c'l'è amni andrera, u smeja ciücià dai plisón! E amni nént a dè che i Pulitic 'i mòngiu', perchè me ai crèd nénta. La gròina c' a j'ava me a l'è che Mafé a l'auriva andè ònche lü: a l'ha dicc che, pitost 'd stè a cà a parlè col bëci, el preferiva criè con Pappalardo!

Però, se 't uardi is trasmision, u j'è ammach 'd la gròn publicità. Del vòti im voru pròpi piè an gir. I j'hòn tirà fora cula quistion del 'conto arancio', che 't póri guadagnè di sòld se 't tróvi la süca. Me a j'hó uardà an gir a Lisòndria: ad süchi a n'hó visti tònti, ma ad sòld sémper pòchi!

Eh zà, perchè ai sòld ui pensa u noster Minister 'd l'Economia Tremonti, che, del vòti, u tira fora di nòm... A l'ha c'ménsa cun 'lo scudo fiscale', che Narcis a l'auriva ch'ai la regaleisa a Nadal. Pó' a l'ha tirà fora el 'condono tombale', che me a j'hó pensà: "A l'è meja n'afari ch'el porta scalogna?! Chi i j'hòn stüdià la manera 'd fè girè l'ogg?".

Eh, sé! Ormai a amnuma sémper pü vègg. La vita a s'è slungaja, la gent la stüdia, i c'ménsu a travajè sémper pü tardi e anlura i s'a spusu che ormai i son talment vègg, ch'i fòn pü meja 'd fió. A j'hó vist el me amis Pidrén, c'l'ha pü o menu la me età, e a l'era an gir cun la so murusa Cichina, c'a l'è singònt'ani ch'is parlu, e lur i sarreisu ancora andacc anòn a parlèsi. El probléma a l'è ch'i son amni uèch e is entivu pü e anlura i j'hòn pià la decision ad spusèsi, e i j'andavu an gir a fè la 'lista nozze'. An bèl mument, a lü ui ven mà la testa e i vòn an farmacia a crumpè in cachèt. E tònt ch'i son andrenta, lü u c'ménsa a dè: "Uarda, u j'è el savati culi comodi per el siguli; pó' u j'è l'afari per amsürè la presion; ua', la roba per la dentera e i pannoloni! Fuma n'afari Cichina, la 'lista di nozze' a la fuma chi e us na parla pü!".

Ammach i pulitic i son sémper an furma. Lur i vivu a Ruma e i fòn tüta in'atra vita, e i venu nént vègg. A j'ev vist el vègg Minister Colombo ch'i l'hòn ciapà cun tüt u so gir ad duneini, ònche giuvni. E i m'hòn spiegà c'l'è tüta

quistion 'd na puvreina magica... Adès a j'hó ant la ment 'd pruvè ònche me a tirè sü co' u nas na busteina d'Idrolitina, per vighi s'im pasu el gòmbi mòli!

Ant el mond a suma nént andacc tòntu ben. La ròba pü bèla c'a suma stacc bon a fè, a l'è n'atra guèra e u j'è mort in bèl pò' 'd gent, cumpreis i noster carabinieri. Pover fanciòt! I m'avu dicc che 'sta guèra a l'era facia per ciapè in ditatur periculus, che adès ch'i l'hòn ciapà, cun 'sta barba e i strass c'l'ava adès, u smijava Gilindu! Per furteina che noi Italiòn a j'uma dacc na mòn; sé, perchè i l'hòn ciapà cula giurnà du sciopero di ferro-tranvieri: i j'avu poua c'u scapeisa col filobus! L'è che, adès, u j'è in mügg ad disocupà: tücc i so sosia! Me am ricord la cunferensa stòmpa quòndi che Bush a l'ava anuncià 'sta guèra e in giornalista a l'ava ciamà la parola e 'l President ui dis: "C'mé t'at ciami?". E lü: "David". "Se 't vori savei, David?". "President, a j'hó du dumòndi da fè: la prüma, perchè c'a fuma 'sta guèra, la sconda a lè quònt temp c'l'andra anòn 'sta guèra?". Ant cul mument, ui souna u telefono e Bush u sòrt. Quòndi c'u rientra, in ater giornalista ui ciamà: "President, a j'hó tre dumòndi da fè. La prüma, perchè c'a fuma 'sta guèra, la sconda a l'e quònt c'l'andra avònti 'sta guèra, la tèrsa: andó c'l'è andacc a finì David?".

Me a pens che la guèra a l'è pròpi na brüta ròba. U sarreiva mei ch'i penseisu an pò' menu ai sòld e an pò' pü tònt ai cumandament du Siur Mesia e aj'insegnament 'd Sòn Fransësc!

A prupòsit 'd Sòn Fransësc, a voi salutè u nov Pruvincial: Padre Roberto Zappa, c'l'ha pià el pòst 'd Padre Giulio c'l'è andacc ad Arona. E salutuma ònche u nov Asistent: Padre Tonino e Padre Lorenzo, ch'el fa giughè i noster fanciòt. Adès però a la piònt lé e av present la me famija...